

ODLUKA

o utrošku sredstava doznačenih po osnovu Sporazuma o dodjeli transfera Gradu Sarajevo za projekat Grada Sarajeva „Sufinansiranje 40. godišnjice obilježavanja ZOI 84“

(Prijedlog)

**Predlagač:
Gradonačelnica Grada Sarajeva
Gradski vijećnik Toni Vukadin
Gradski vijećnik Adi Škaljić**

Sarajevo, januar 2024. godine

Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), a u vezi sa Zaključkom Odbora za organizaciju obilježavanja 40. godišnjice Zimskih olimpijskih igara održanih u 1984. godine u Sarajevu, broj: 04-GV/OO-02-90-1/24 od 22.01.2024. godine, Gradsko vijeće Grada Sarajeva na 35. sjednici održanoj dana 24.01.2023. godine, donijelo je

(prijedlog)

ODLUKU

o utrošku sredstava doznačenih po osnovu Sporazuma o o dodjeli transfera Gradu Sarajevu za projekat Grada Sarajeva „Sufinansiranje 40. godišnjice obilježavanja ZOI 84“

Član 1.

Zadužuje se gradonačelnica Grada Sarajeva da se sredstva doznačena Gradu Sarajevu po osnovu Sporazuma o dodjeli transfera Gradu Sarajevu za projekat Grada Sarajeva „Sufinansiranje 40. godišnjice obilježavanja ZOI 84“, broj: 01/10-11-8462/23 od 29.12.2023. godine, utroše na način kako slijedi:

- 50.000,00 KM (slovima: pedesethiljada konvertibilnih maraka) – JU Narodno pozorište Sarajevo, pozicija 614100 - Tekući transferi drugim nivoima vlasti, organizacija Svečane akademije povodom obilježavanja 40. godišnjice ZOI 84;
- 100.000,00 KM (slovima: stotinhiljada konvertibilnih maraka) – KJP Centar Skenderija Sarajevo, pozicija 614400- Subvencije javnim preduzećima, sufinansiranje uslova za organizaciju događaja iz Programa obilježavanja 40. godišnjice ZOI 84;
- 100.000 KM (slovima: stotinhiljada konvertibilnih maraka) – KJP ZOI 84, pozicija 614400 – Tekući transferi drugim nivoima vlasti, sufinansiranje uslova za organizaciju događaja iz Programa obilježavanja 40. godišnjice ZOI 84.

Član 2.

Preostali dio sredstava u iznosu od 60.000,00 KM (šezdesethiljada konvertibilnih maraka) utvrđen Zaključkom Odbora za organizaciju obilježavanja 40. godišnjice Zimskih olimpijskih igara održanih u 1984. godine u Sarajevu, broj: 04-GV/OO-02-90-1/24 od 22.01.2024. godine - primjena Odluke o uslovima prihvatanja pokroviteljstva Grada Sarajeva za pokroviteljstvo koncerta Tonija Cetinskog u organizaciji STAGE PRODUCTION d.o.o. Sarajevo – pokroviteljstvo Gradskog vijeća, ostat će neutrošena zbog nemogućnosti zakonitog i na propisima zasnovanog unosa i utroška istih.

Član 3.

Gradonačelnica Grada Sarajeva će u cilju realizacije navedonog u tački 1. ovog Zaključka donijeti posebnu Odluku o unosu neplaniranih sredstava u Budžet Grada Sarajeva za 2024. godinu.

Član 4.

Ova odluka stupa na snagu danom donošenja i bit će objavljena u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:
Sarajevo,

Obrazloženje

PRAVNI OSNOV

Pravni osnov sadržan je u odredbi člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), kojim je propisano da Gradsko vijeće donosi odluke, druge propise i opće akte, a sve u vezi sa Zaključkom Odbora za organizaciju obilježavanja 40. godišnjice Zimskih olimpijskih igara održanih u 1984. godine u Sarajevu, broj: 04-GV/OO-02-90-1/24 od 22.01.2024. godine, kojim je utvrđena namjena sredstava doznačenih iz Budžeta Kantona Sarajevo Budžetu Grada Sarajeva u ukupnom iznosu 310.000,00 KM za podršku organizaciji obilježavanja 40. godišnjice ZOI održanih u Sarajevu 1984. godine, na osnovu Sporazuma između Grada Sarajeva i Ministarstva kulture i sporta Kantona Sarajevo.

RAZLOZI DONOŠENJA

Sporazumom o o dodjeli transfera Gradu Sarajevu za projekat Grada Sarajeva „Sufinansiranje 40. godišnjice obilježavanja ZOI 84“, broj: 01/10-11-8462/23 od 29.12.2023. godine, utvrđeno je da će Ministarstvo kulture i sporta Kantona Sarajevo sretstva u iznosu od 310.000,00 KM uplatiti Gradu Sarajevo, a za potrebe realizacije Projekta Grada Sarajeva „Sufinansiranje 40. godišnjice obilježavanja ZOI 84“.

Obzirom da je zvaničan i potpisan od strane Ministarstva Sporazum dostavljen Gradu Sarajevo, te da odredbama citiranog Sporazuma nije pobliže preciziran način utroška sredstava, to je potrebno da se isti i utvrdi kako bi se već doznačena sredstva mogla unijeti u Budžet Grada Sarajeva.

Posebno se naglašava da je svako dodatno odugovlačenje potpisivanja dostavljenog Sporazuma, moglo dovesti u pitanje realizaciju istog (kraj budžetske godine), te se isti cijeneći naprijed navedeno i potpisao.

Obzirom da je u vezi sa naprijed navedenim potrebno utvrditi način utroška sredstava pri tome se indirektno rukovodeći Zaključkom Odbora za organizaciju obilježavanja 40. godišnjice Zimskih olimpijskih igara održanih u 1984. godine u Sarajevu, broj: 04-GV/OO-02-90-1/24 od 22.01.2024. godine, kojim je ovo tijelo utvrdilo namjenu doznačenih sredstava, to je neophodno stvoriti bitne uslove utroška, a sve u cilju obezbjeđenja zakonitog i na propisima zasnovanog unosa i donošenja ispravne odluke o unosu od strane gradonačelnice Grada Sarajeva, koji u ovom momentu de facto i de iure ne postoji.

Također, Odlukom je utvrđena da će sredstva u iznosu od 60.000,00 KM utvrđena Zaključkom Odbora za organizaciju obilježavanja 40. godišnjice Zimskih olimpijskih igara održanih u 1984. godine u Sarajevu, broj: 04-GV/OO-02-90-1/24 od 22.01.2024. godine -primjena Odluke o uslovima prihvatanja pokroviteljstva Grada Sarajeva za pokroviteljstvo koncerta Tinija Cetinskog u organizaciji STAGE PRODUCTION d.o.o. Sarajevo – pokroviteljstvo Gradskog vijeća, ostati neutrošena zbog nemogućnosti zakonitog i na propisima zasnovanog unosa i utroška istih.

Naime, obzirom da organizator navedenog događaja nije neprofitno udruženje/organizacija, te da su sredstva koja se mogu koristiti na ime pokroviteljstva u Budžetu Grada Sarajeva za 2024. godinu planirana na poziciji – Transferi neprofitnim organizacijama, to je postojala objektivna smetnja za utvrđivanje ispravnog načina utroška ovih sredstava.

Do prethodnih saznanja se došlo na osnovu konsultacija obavljenih sa nadležnom Gradskom službom za obrazovanje, kulturu, sport i mlade.

Prijedlog Odluke dostavlja se Gradskom vijeću na razmatranje i odlučivanje.

FINANSIJSKA SREDSTVA

Za realizaciju Odluke sredstva će biti obezbjeđena u Budžetu Grada Sarajeva za 2024. godinu.